

FILIPPIEDDU 7-8-9 AGOSTO 2009 = XXXII EDIZIONE
A ENZO ROMANO

Nun sugnu cuomu a tia,
nun haiu na bona parlantina,
nun sacciu scriviri poesie
né fari cunfirenze,
sugnu affruntulinu.
Ma sulu pi tia,
u miegghiu amicu miu,
vuogghiu riri ddu paruleddi
e sugnu sicuru ca tu l'ascuti.
Quantu a vultu beni a Mistretta,
u to paisi, u sanu tutti
eni sunu testimuni tutti l'opiri tui.
Ri tia poeta e scrittori n'anu parlatu
E ni parlirannu tanti autri
Chiu allitrati ri mia.
Iu vuogghiu arriurdari l'amicu
Ri l'amici ri Filippieddu.
Ca n ci si chiui ancora nun ci cririmu,
nni pari c'avissavi a spuntari,
ri sa' chiurena, ri minutu a n'autru
cu na patata n'ta na manu

e mienzu bicchieri i vinu n'ta l'otra
riciennu: "E chi n'avimu ra vita "
Ancora nun ni pari veru,
ma nun ci si chiui.
U to cuorpu nun è ca stasira a cantari
"nun mi tuccari u peri caiu a dormiri"
O "U sulì ggìa spuntau mienzu a lu mari"
Pi tia stu sulì nun spunta chiui
E pi nuautri amici,
u durici ri giugnu si furminau
a miegghiu lampadina.
E puru no! Pi nuautri nun si muortu,
a to vuci a sintimu u stissu
si cà assittatu chi manci e bivi,
chi reciti cu mia "Piddu e Puddu",
canti stornelli, fai comu sempri batteria
e tieni allegra sta compagnia.
No nun si muortu!
Campi ancora cu i to poesie,
cu i to cunti, cu i to storie,
ma soprattutto, almenu pi nui,
cu l'amicizia vera
chi ni ravi e chi ni runi,
circannu r'essiri sempri allegru
e cuntentu e d'addivirtiriti cu nenti,
simplicimenti e senza smanciarie,
Nuautri u sapimu ca tu ni viri e
Ni pienzi sempri e,
canusciennuti comu ti canusciu,
sugnu sicuru ca unne chi si.
N Pararisu, o Priatoriu e,
picchi no, macari o Fiernu,
cu l'Ancili o cu i Riavuli,
sta priparannu pi nuautri amici
n' Filippieddu Eternu.

Gino Piscitello